

Terengganu sedia hadapi gelombang kedua banjir

DUNGUN - Banjir yang kembali melanda Pahang dan Kelantan serta hujan di beberapa daerah di Terengganu menyebabkan penduduk membuat persiapan awal memindahkan peralatan rumah ke tempat selamat bagi menghadapi gelombang kedua banjir.

Tinjauan di sekitar Hulu Dungun mendapati penduduk membuat persiapan awal dan mengambil langkah berjaga-jaga dengan mengalihkan barang berharga ke tempat lebih tinggi dan membeli bot bagi memudahkan perpindahan.

Seorang penduduk, Kassim Ali, 43, dari Kampung Padang Ping, dekat sini berkata, dia membeli bot untuk persediaan menghadapi banjir.

"Kalau air naik, bot itu akan kami gunakan untuk berpindah ke pusat pemindahan dan saya juga akan tolong orang kampung yang tidak ada bot untuk berpindah.

"Peralatan rumah, kami sekeluarga sudah diangkat ke tempat tinggi dan dokumen penting kami di simpan di tempat selamat termasuk buku teks dan pakaian sekolah anak. Kami bimbang air sungai melimpah pada waktu malam," katanya ketika ditemui di sini semalam.

Che Wan Khatijah Che Wan Alim, 51, dari Kampung Kambal, Kuala Jengai berkata, hampir setiap malam sejak minggu lepas, dia tidak dapat tidur lena. Katanya, keadaan itu sudah menjadi kebiasaan bagi penduduk di sekitar Hulu Dungun kerana setiap kali musim tengkujuh, banjir berlaku lebih daripada sekali.